

定襄縣補志

人物

信

(25056)

定襄縣補志卷之八

人物志

鄉賢

忠臣

孝弟

義行

武功

隱德

文苑

流寓

異人

糾誤

著述

天地清淑之氣不因世宙昏濁遂湮沒弗彰且有
際會之泯芴罔中于信而剛健篤實之操以相薄
愈發其光者此不獨立德立功立言有然即至流
仙釋異人亦可激揚千載夫孰非粉榆光乎茲按其
生平別其義類要皆採之公評參之輿論而始節錄
於篇以俟藻鑿人倫者擇焉志人物

定襄縣志
地方文獻

鄉賢

明

劉圓僧西邢都人洪武中以學行授翰林洗馬侍皇太子讀書執坐講之禮侃侃數百言不止太祖命皇太子師事之後以目疾致仕晉贈太傅及靖難師起數諫爭言相教成祖怒碎其表圓僧遂絕飲食而死

郭瑄號慎齋參政麟之子永樂辛卯舉人歷官左春坊贊善性不苟合人多憚其方嚴一時權貴爲之歛迹幼讀大學便立志學爲聖賢長讀程朱遺書歎曰聖學淵源在是立體致用壹意以程朱爲宗辭文清公爲撰慎齋記相與鼓吹儒林以翊世道於不衰故輿論交推曰宋南渡而朱子生明北遷而慎齋出及卒晉王題其墓曰文節先生

樊睿號思菴漢舞陽侯噲之四十五代孫成化戊子舉人除浙江衢州府推官防奸撫善賑荒禮賢條平賦役德政爲一時最民感祀之其學務窮本源不爲章句訓詁嘗曰太極圖我我圖太極蓋謂

天命之性其本原出於無極我信能及此則天地無非太極也又曰道無爲也而無不爲道無物也而無不物物物而不物於物道之體立焉道之用行焉當其無有有之用當其有無無之體人自滯於有遂無以通於無傳青主謂敬軒倡道冀北得其復性之祕於不傳者惟思菴一人而已督學袁繼咸謚爲文惠先生

國朝

樊翰字林卿文惠先生八代孫邑廩生天姿純篤充養有道幼時當事卽重其名有巨卿願以千金聘爲主幕翰曰丈夫宜自立吾豈以多金爲他人用耶年十四讀孟子至舜何人章拍案大呼曰昔孟子憂其未免爲鄉人而必欲如舜爲法天下可傳後世卒爲百世師我可不爲百世師乎遂焚所作時藝以師禮見李二曲於襄城爲學務期實踐以孝弟爲本以忠恕爲要以聖學始終在於誠因以誠名軒督學嵇曾筠謂林卿之學蓋因靜以見理因理而得敬因敬能至誠至誠之道惟林卿有

焉及卒學者奉其誠軒語錄如拱璧因私謚孝弟先生

鄭相字似僑參政友周六代孫雍正丙午舉人歷官陝西乾州知州政績丕著其在未仕一督辦河南外簾一分校陝西棘閣得人爲盛在府谷兼署榆林神木葭州三印神木先有脫案未獲視致斃物乃門限下磚知不出鄰境喚案中人詢其情故見一人氣色有異給以他故片語卽伏眾驚爲神明積六年擢知乾州乾爲甘省大路民屯錯處素號繁劇難治輒案不留獄懾其刁健者延師課士建立書院諸務興舉三年以病旋里遂不復出優游林下十餘年乃卒

牛玉怡字恭叔待陽都人雍正癸丑進士授廣東恩平縣知縣補直隸廣宗縣知縣釐奸剔弊凜若神明他邑枉滯多乞赴宗辨師事樊翰翰解易惟以屬怡怡遂以易爲宗以學庸爲體以詩書爲用以程朱爲法其闡解爲學者所遵曰牛先生說也政績畧見本傳

鞏懿修字恭甫義士獻德子七歲能文淹貫百家執
親喪哀毀特甚苦塊米飲不茹蔬果事胞兄備極
愛敬純於理學每以義利之辨定君子小人鄉人
賢之舉乾隆癸丑進士補浙江蘭安知縣興利除
害邑中肅然浙撫以誠實幹練有守有爲專摺請
調烏程知縣士知學道民德善政嘉慶辛酉內陞
主事不就爲文備韓柳歐蘇體蔚爲一代宗工學
術詳見著述

萬二千五百家爲鄉一時爲百世師爲賢爲鄉善易
爲鄉賢難爲鄉善立言一時易爲鄉賢師表百世難
從古善者忽祀一鄉賢者必祀天下天下祀之而亦
必祀之於其鄉者鄉之人仰之慕之而不能已越千
百世猶藉之以光益高山景行意也若非賢而濫廁
豈不貽笑大方乎

忠臣

明

王 勝字茂卿嘴子村人隨太祖進征康郎山下身
中流矢墮馬坐地而亡死後猶怒目張口一手據

地如生贈太原郡侯襲侯爵

吳 昂字仰之南關廂人成化乙酉舉人授山東萊陽知縣時有河南李轍詐爲劉檢憲姪劉某昂於此事面詰其情解臬司廉憲曰似此不可姑息誠可嘉尚遂移檄六府以美之明年建利民三倉儲粟六萬賑貧于是流民復業千數又萊東招虎山有白臉虎白晝噬人昂禱於神虎忽自斃衆驚爲神異其他異績見舊志

楊淑暢字惠卿趙村人少學於樊睿學舉業睿教之曰今人經學全不理會聖賢作用行事佔畢祇爲帖括計幸而得之不免爲庸夫俗子况一敗塗地者乎子試以吾言求之庶不至與明心見性之功終隔而於朝聞道章聖意便近暢遂以優貢授光祿寺錄事兩舉卓異陞直隸冀州判官明賞罰布威信未及期年功化以就百姓畏而愛之

喬 震字文東南關廂人經學出於文惠先生宏治壬子舉人授直隸灤城知縣補陝西綏德知州委理延綏屯田奏陳八事忤劉瑾意坐浮躁鐫秩一

地如生贈太原郡侯襲侯爵

吳昂字仰之南關廂人成化乙酉舉人授山東萊陽知縣時有河南李轍詐爲劉檢憲姪劉某昂於此事面詰其情解臬司廉憲曰似此不可姑息誠可嘉尚遂移檄六府以美之明年建利民三倉儲粟六萬賑貧于是流民復業千數又萊東招虎山有白臉虎白晝噬人昂禱於神虎忽自斃衆驚爲神異其他異績詳見舊志

楊淑暢字惠卿趙村人少從樊睿學舉業睿教之曰今人經學全不理會聖賢作用徒事佔畢祇爲帖括計幸而得之不免爲庸夫俗子况一敗塗地者乎子試以吾言求之庶不至與明心見性之功終隔而於朝聞道章聖意便近暢遂以優貢授光祿寺錄事兩舉卓異陞直隸冀州判官明賞罰布威信未及期年功化以就百姓畏而愛之

喬震字文東南關廂人經學出於文惠先生宏治壬子舉人授直隸灤城知縣補陝西綏德知州委理延綏屯田奏陳八事忤劉瑾意坐浮躁鑄秩一

級拂衣歸里有終焉之志瑾誅擢延安知府不就
世咸以靖節許之其他異績已載舊志

喬 份南關廂人以材武授百夫長正德六年賊聚
東山土嶺口份率眾擊之抵賊巢賊出不意幾驚
潰已知爲孤軍無後援悉眾拒之份瞋目橫刀所
向披靡力竭勢窮被執不屈辱罵百端賊怒剖腹
事聞朝廷嘉其忠烈命子孫世襲其職

張九戩字鰲川同知偉之姪嘉靖丁酉舉人授浙江
嘉興府通判不避權貴尤惡貪暴人稱鐵通判陞
直隸蘇州府同知有善政威惠並行爲嵩黨所傾
陷論者痛惜異績詳見舊志

樊啟東字汝暘文惠先生曾孫嘉靖癸卯舉人除直
隸吳橋知縣約己愛民省刑恤老橋人德之作循
良錄素爲大學士徐階所推薦階與嚴嵩不睦嵩
因詆東左道惑眾詔貶淮陰驛丞肅宗用御史鄒
應龍言留任隨以弱疾致仕卒於家時年四十九
朝士相與涕泣悼之

薄匡字字子春芳蘭人萬曆己酉舉人歷任陝西安

定鎮安石埭靈臺等縣知縣服闋補永壽知縣崇
貞八年八月賊陷永壽城匡字提矛迎戰擊死二
十餘賊墜馬被執罵賊不屈死督師孫傳庭額其
門曰貞節大儒勅封商州知州事載明史忠義王
國訓傳內子味美孫厭奢能世其家

國朝

李士麟字九真橫山人崇貞乙亥拔貢經學出於樊
尚簡賦學出於周宣少有大志嘗約張宗孟爲忠
臣宗孟曰吾願爲智士士麟曰我願爲忠臣順治
初除江南海州同知政尚簡易六年海賊傳僞牌
至擊碎之亟與紳士分城而守賊尋至攻城輒敗
之已而賊大至城陷不屈死 勅賜祭葬如制嘉
慶九年追襲恩騎尉

薄而堅字石生芳蘭人康熙辛卯舉人授山東定陶
知縣時值亢旱興役增隄或謂邑無水患何以役
爲而堅曰豫備不虞古之善計也卒成之是年河
決水果至不能冒隄而止又留養江省飢民八百
餘口衣食居處每事必親區畫飢民咸得全活及

卒知縣鍾一誠私諡曰康成

高一元字映垣城中人道光壬午歲貢授絳州垣曲縣訓導視身範士務砥礪名節次乃及文藝縣令晏宗望引重主白水書院闔學弟子員雋者從講學咸豐三年髮賊抵城下元擲鋒刃投矢石與賊抗拒賊穴地擊礮城陷元旋學宮整衣冠坐明倫堂上賊至大罵曰鼠輩 國家深仁厚澤二百餘年何負於汝而甘心從逆耶賊露刃脅降元曰守死降亦死曷若守死爲忠義鬼遂遇害

讀詩至夙夜匪懈以事一人乃知龍逢深諫王子直言荀息期死以對狐突任執不從者忠也惟義所在也襄習唐虞忠直之風負燕趙慷慨之氣成仁取義代有其人如吳昂之神殺暴虎王勝之死坐猶生楊惠卿期年功化以就喬文東八事昌言奏陳樊吳橋徐階推薦張蘇州嚴嵩陷傾喬百長舍生取義薄子春殺賊有聲莫不心根大義志極丹誠至於憤恨僞牌之至九真男兒傷心義鬼之爲一元忠蓋增隄禦水留養飢民清風大節亘古亘今後之人聞風興起

借鑒觀身庶忠義之人相承勿替焉

孝弟

明

趙官北關人任山東歷城縣丞慎親之終撫育幼弟人稱孝友且遇事敢言薄嚴嵩之爲人遂被陷削籍歸

國朝

張九武馬城村人順治初年父朝柱殺人應抵弟九昌九思九望俱幼九武慨然告擬法者曰父生我身願以身代擬法者遂釋其父未及置法斃於監時年十九諸弟築墳羣鳥銜土助之人咸以爲孝感所致

薄建功字漢鼎芳蘭人順治甲午舉人性至孝以養母終身不仕母沒悉遵家禮儀節年七十猶壯誦宋六子書不少輟無疾而卒

李昌齡中霍鎮人事祖父繼母至孝耕耘爲業勤身苦體以資奉養親族感其孝爭以酒肉遺之亦不受

樊 灝字太素孝弟先生同母兄事親色養兼敬時稱大孝懿行凡百有四條不及備載只取一二遺事以概其餘十歲喪母母于賽日亡來歲舉賽灝感念母哀甚聞者爲之罷賽繼母牛嗜棗有棗結實母命守之每暴風雨灝輒抱樹而泣風雨頓止遭父喪哭輒嘔血三旬之內絕而復甦者七有白鳥數百集墓廬候哭而來哭止而去本傳載拾遺

集畧見藝文

牛儲文亦名裕武待陽村人事親能孝竭誠盡慮無微不至與兄梅占式好無猶每出必告及歸雖昏夜必見手足之情老而彌篤自奉極約惟子弟讀書延師不惜費情文周至至若矜孤恤寡敬老憐貧樂善不倦難以枚舉子先達官江浦知縣人咸稱其來有自云

李彥俊西河頭人事繼母孝母性嚴峻婉顏承順每訶責輒跪地色霽乃起久之母亦自化融洩無間言詳見藝文

樊榮祖字紹先孝弟先生孫授徵仕郎性至孝父老

定襄縣志 卷八
多病偕妻翟氏未嘗離左右思父得病之由或以
飲食或以燥濕或以言語稍多或以憂喜稍過於
是朝暮候視無毫髮不盡五臟六腑中事皆洞見
曲折不待切脈而後知故用藥必效鄉里驚歎以
爲誠孝所感嘉慶八年知縣王之屏匾其宅曰善
體親心人有不愛敬父母者必苦勸之且泣曰吾
深以不得侍親爲痛汝幸不離膝下何爲不孝人
皆感化詳見本傳

郭會朝西邢村人幼失怙事母至孝族黨皆稱之爲
人忠厚慈祥有爭訟者力爲和解一日至忻州城
見有婦女相持大慟會朝問之知婦夫被陷將賣
女以償夫贓罪因急售已驢代償全其母子與人
不以貧而生惡賤而生慢嘗令其子興旺習諸藥
性以癩奇疾人多德之孫安齡安鉦皆登進士官
翰林州縣

薄 巖字魯瞻芳蘭人以歲貢授廣靈縣訓導父齊
尹少有顛病巖百端周旋委曲事奉難以殫述晚
年病愈不能動履巖時以兩杆縛一椅著一人與

昇之以便遊覽年七十享祖考猶親滌器人或請代之不從以爲無以達追慕之思也人咸稱孝爲人端方正直洞悉事理凡閭里有互爲爭執不相下者巖爲指陳是非曲直無不帖然心服一方鼠牙雀角之端賴以消釋者不可勝紀

趙 菴趙家營人事孀母以孝聞叔有側室嫡不能容菴多方調理生二子叔卒嫡復欲逐庶子又爲維護得勿逐族弟其貧不能爲子娶菴出己財以聘焉一生不言人過失與子言孝與弟言恭年八

十四端坐而逝

智增全南西鄺村人甫二齡父出外十六年不歸亦無信稍長欲尋父母不許後從兄以補鍋爲業逐處尋訪於遼東獲見父迎歸奉養父年八十四終子履中歲貢人以爲孝致云

趙一誠菴三子父年老夙夜奉侍不離寢側者二十餘年兄長二歲終身不違兄言族叔某有瘋疾無人收養迎至家調養得痊族某因貧鬻妻捐己財并募戚屬助之得不鬻鄉里乏衣食者求之必應

郭太史安齡爲之立傳

梁濟與邑庠生義士而實元孫性誠篤兩事繼母皆贊其孝人無間言鄉黨有勃谿事皆來就理解紛排難幾無虛日其鄉四十餘年無訟於有司之庭皆其力也鄉某氏有兄弟之變勢洶洶將操戈委曲調劑遂爲兄弟如初戚某氏構家難力爲區處事得解其家婦孺羅拜曰微公則闔門狼藉矣子三次契孔癸卯舉人三述孔丙申進士卽用知縣徐潤第有世德傳行世載敦良齋文集

侯運達神山人家貧業賈偶遠出聞父病星夜馳歸寢食不離親側病愈乃復初少失恃事繼母無違友愛異母弟妹不吝財物弟素憎運達遇之無禮及弟病運達盡心事湯藥飲食必嘗而後進者累旬弟深感媿友愛遂篤與人交不苟取言不虛妄子禮賢增廣生親賢登進士官禮部

邢達順字體山東霍都人嘉慶戊寅舉人公舉孝廉方正授岢嵐州學正引諸生告曰凡學所以學爲忠與孝也諸生成服性至孝爲父所鍾愛父嗜菽

定惠和志 卷八
一四
絲嘗呼達順共食及父歿終身不食瓠絲族有孤
貧子矜恤保全躬自教督使有所成立者凡數家
爲人質直敦厚於書無所不讀而其教子孫必先
孝弟而後文藝嘗曰士無實德一號爲文人無足
觀矣子孫至今奕顯

王九思受祿人在抱失怙甫能言卽向母尋父母佯
答以他往稍長知其故不覺慟哭曰人皆有父我
獨亡遂自括髮不復櫛沐髮幾禿落母諭之以命
數之義思感悟遂節哀服賈以鬻供養之資每入

門則呼母數聲母有憂曲意寬解及年邁猶作小
兒狀繞膝而嬉以資色笑凡衣食必先與伯叔而
後及妻子叔弟九卿欠外債二千餘金思悉爲償
殊無難色母歿竭力治喪葬遇大風雨哀禱卽止
同治十一年學院龔公承鈞匾其門曰蘭陔養志

孔子曰入則孝出則弟有子曰孝弟也者其爲人之
本與人生斯世未有大本不敦而可無愧於人道者
也襄習唐魏之風負堯舜之性孝弟之道繼繼承承
如趙官稱家之盛卽國之楨張九武代死彰節薄建

功不仕著名樊灝天下皆欲爲子儲文一鄉共羨爲
兄李彥俊誠能動物樊榮祖善體親心是皆不因學
藝而重不待爵祿而榮者也至於萬里尋父寸步隨
親繼母贊孝族黨稱賢亦本順德俱可千古生斯地
者聞風興起孝弟之心可以油然而生矣

義行

明

韓信甫字中孚南關人出自有宋康國公絳原籍靈
壽承安閒其高祖避亂馬邑又爲馬邑人至信甫
客居本邑樂此風土遂占籍焉洪武二年兵荒之
後發粟助賑一鄉賴以全活草昧之初學校廢墜
祠廟多其督建每旱潦必貸匱蠲負里無逋家衣
冠子女不能自歸者代婚嫁之勅授八品義官辭
不受遠近咸高其義

樊 鑑字君重文惠先生孫廩生入國學肄業徐文
貞公階時爲祭酒奇其文因日進爲講說經義期
滿除陝西麟遊縣丞初涖政亟罷夙錢之困民者
日頂替日寬限日常例日納草麟人特感爲來蘇

父母業官二載陝撫擬右遷不就即日解印綬歸
創建水磨於兩霍間使人米麥遐邇稱快嘉靖辛
酉歲大飢出粟米麥豆九百石沿戶給散日無甯
息萬厯三年卒士民弔哭者累月不絕

薄 琦芳蘭人正德間父御以江西建昌倉大使告
疾旋里卒旅邸琦扶櫬千里歸家居喪守禮泣血
三年值歲飢捐粟千斛廣爲賑濟賴以全活者甚
衆又爲貧乏者代完糧銀三百餘兩嘉靖中鄰某
被虜琦聞之徑趨賊巢諭以大義賊感動釋鄰某
歸知縣劉天敘表其閭

梁志學東鄱村人贊雄於鄉正德間歲大荒無問親
疏遠近凡稱貸者悉周給之不責其所不償遇婚
喪力乏者必濟之有告急者即赴湯蹈火亦不惜
嘉靖乙未以太學生除南京鴻臚寺序班時即官
失儀私覲志學責以大義奏上即落職時人咸服
其義

國朝

薄成功字績軒琦之曾孫明季諸生值鼎革之際捐

貴團鍊鄉勇修築堡牆與賈成真規畫周密扞禦多方芳蘭得以安堵撫憲聞之旌以匾曰干城待選又建安村南有大關寺係定台兩邑要衝成功於寺前買田三十畝設茶亭以濟行人裔族有登黃甲者一人領鄉薦者七人貢成均遊膠庠者二百年來幾以百計則餘慶之必有益信

賈成真字拙菴芳蘭人明季諸生當革命之秋規畫方畧曉譬利害發儲粟以散給貧民齊壯丁以協同防禦土匪張五桂約高山正月廿日攻芳蘭堡村衆告急成真佯不應於元宵出賊不意率衆擣其巢擒斬四十餘人高山負嵎賊衆漸散歸農事聞特旌以殺敵致果及卒里人私謚曰平定先生梁而實號古秋師家灣人增廣生員負氣敢往順治初土賊高山據東山作亂夤夜入寇掠其馬去而實單騎見高山申以大義詞極剴切賊遂解散嘗設教陽曲書童張某失怙恃無依收爲義子改名梁逢甯析以產典史李雲鳳匾以文行兼優進士劉嗣漢爲作古秋先生傳

郭金寰西邢村人順治初遭姜逆亂同弟文寰防禦西邢五台土賊張五桂進攻晝夜戰井水竭三日而圍牆陷被執賊脅降金寰瞋目罵曰我世爲良民守忠義恨不斬汝以靖亂乃從汝反耶遂遇害郭文寰金寰弟值土賊張五桂至與仲兄金寰率眾死戰兄爭先殉難文寰亦被執賊加刃頸上曰降我當活汝文寰叱曰汝知有罵賊而死者郭金寰乃吾兄耶吾兄既舍生取義吾亦當殺身以成仁賊怒乃遣羣醜縊殺之

樊虞佐孝弟先生父順治元年僞將柳同春糾其黨攻縣城虞佐率僮僕及鄉人捍禦已而賊益眾不能支虞佐伏眾城下遣人出城誘賊賊遽入城伏起乘之賊大亂擒斬無算城獲全知縣文璧星槩以晉昌保障迨四年鄉人皆投姜逆僞劄轉相煽惑縣城失守知縣祝文光拒賊力戰死虞佐亦被難垂死復甦追賊至西邢獲之寸磔以報官九月宣府總兵李延壽以兵來援聞之獎以義勇特薦任度支辭不受及卒知縣王時炯倣古例私諡武

肅先生

石文煥字昌明舍曠父家世儒業素封仗義好施有
亡友遺一女賣與人爲婢文煥捐金贖之嫁與士
族順治元年值僞將柳同春攻城樊虞佐約守城
文煥允諾爭先督衆捍禦奮勇罹難遂保無虞迨
鄉人授姜逆僞劄董村震驚文煥率衆規畫防禦
一村賴以安堵知縣陳宗義給匾曰公爾忘私文
煥遜以爲未能裔族至今鼎盛

賀景賢蘭臺鎮人順治初五台甯武賊起攻蘭臺堡
景賢糾衆禦之殺賊數十人堡獲全當道者特獎
其能康熙初山左大飢窮民流徙定襄者甚多景
賢捐米煮粥匝兩月全活無數人咸德之景賢初
名景後鄉人景其賢因送徽名曰景賢

智安仁南鄺村人介賓順治初流賊攻南鄺堡安仁
率鄉衆守禦賊掘堡陷數丈衆見勢不支四散安
仁獨持刀當堡傾處手格三人大隊畢登被虜入
山醜類叢集無數突有一雞冠賊至大聲急呼曰
此義人智安仁也速送歸安仁熟視之卽向解衣

之餓人遂以大義曉之賊黨漸散知縣陳宗義獎
以義能格奸

鞏獻德鄉賢懿修父乾隆庚辰舉人揀選知縣誥贈
奉直大夫以同邑樊孝弟師蓋屋李二曲直入孔
顏堂與不僅化朱陸異同遂往從之其爲學平正
篤實究心濂洛於性命所得尤邃坐言起動識者
謂爲二曲燈傳及樊孝弟卒獻德曰師之成我與
生我等遂廬於墓側心喪三年於是義聲遠播後
知縣鍾一誠給匾曰獨居三年沈學憲給匾曰是

難能也所著四書註解最稱簡易學者因私諡文
簡先生

郭正修字敬可孝子會朝次子勅封文林郎河南武
安縣知縣與兄弟甚友愛分產析箸義讓族里咸
以爲賢性好施見西邢至縣城村稀水少行者渴
煩遂設茶亭於西古城外以濟行人嘗隆冬晨出
路遇一人倒卧雪中捫之半僵急解裘衣之扶歸
救甦至若繕宗祠立義學及助婚娶營喪葬之類
不一而足也

王光玉受祿鎮人自少父母俱逝從兄服賈式好無
猶晚年兄失耦光玉惻然生傷與兄共處別院朝
夕相依義聚數十年寸絲不入私凡有遺送各納
公室欲用卽請之不問孰爲己物閨門內不下廿
餘人惟光玉命是聽無詬誶勃谿事犬爲人竊去
雞哺其兒人謂和氣所致

宋紹環嘴子村人事親孝晨省昏定終身如一以賈
致富嘗貸人子母錢累數百千積歲月主忘之環
逐一清還無少虧人服其廉正尤慷慨好施親戚
有窘乏者輒周之孫文登鄉科浩廉俱庠生曾孫
鳴清發解

樊福恒西邗人泥工也一日清晨赴他處作工路拾
遺金四十封懼子見藏土中坐待喬某尋覓還之
喬某以十封謝堅辭子曰何爲不受福恒曰吾父
子終日營工猶不能飽煖橫財豈易得汝須安貧
守分子遂用命郭安鈺作義士傳謂有裴氏風云
畧見藝文

梁濟源義士而實元孫太學生敦孝友尙氣誼古道

君子也居鄉嚴正不苟然待人殊寬親族婚葬不能舉及鰥寡孤獨無依者賙恤保全族子弟能讀書者助之薪火曰非以市恩也人生天地固當如是耳病將卒諄囑其子孫以周恤貧乏賓禮有道吳蘭江爲作義行傳

夫義萬事之將國所以立人所以生上下以是正親疏以是明公爾忘私主爾忘身者也如信甫助賑修學君重保民愛人薄琦粟輸千石志學賙恤親鄰功真協力防禦而實勸賊歸農金寰舍生取義文寰殺身成仁武肅保障可許文煥忘私未能莫不利不苟就害不苟去也至於廬墓師喪施茶解渴友兄還債返金篤族廉頑立懦洵足亘百世而常昭矣

文德

周

董 狐董村人爲晉史官靈公欲殺趙盾盾出奔已而趙穿弑公盾遂復董狐書曰趙盾弑其君盾曰不然對曰子爲正卿亡不越境復不討賊非子而誰孔子曰董狐古之良史也

金

孫九疇狀元九鼎仲弟天會六年榜眼官翰林編修
嘗謂吾無他長惟步步踐實地晝之所爲夜必登
記用以自警著有詞林體驗錄亂離之後喪失無
存

孫九億狀元九鼎季弟天會六年探花入翰苑爲應
奉擢選都御史出使西域撒兒馬罕被留

元

樊大有字鼎臣元帥天勝姪十四舉經童授華亭知

縣民懾之如嚴父在華三年野無吹葭之警戶無
犬吠之防吏民相語曰初以伊爲烈風迅雷而竟
爲春雨冬日若此

甄 有趙村人北朝甄彬之後以進士累官兵部尙
書討平邊部世受其福

明

薄 濤芳蘭人成化辛卯舉人授陝西邠州判官省
費愛民一郡無敢以橫斂逞者不激不隨有孚道

一焉

薄世佑字元吉征之孫嘉靖戊子舉人授順天宛平知縣持法不阿一日出有馬頭喊冤者乃貴家奴凌虐一小負販立命捽至鞭三百始釋放市民咸快之愛之者或遺以書曰公不畏丟官耶隨裁答云丟官事小事恩罪大時有不愛一官冤一民宛平今有鐵宛平之謠後官至晉府左相晉階中憲大夫

宋聚奎高蔣人以選貢授山東武城知縣調魚臺知縣陞陝西邠州知州所至有治績少以俠聞賑窮救急傾家無愛

樊伯東字文崇忠臣啟東四弟以優貢授陝西甯遠縣丞委攝縣篆盡心邑事有甲與乙被酒相毆甲歸臥夜爲乙盜牛染其毛次日甲執乙詣縣而乙與甲爭甚力伯東命解牛任其所去牛竟還甲家乙伏罪時人以顧建康目之

樊尙簡字宗約義士鎰次子萬曆丙申選貢授河南宜陽訓導陞平陽鄉甯教諭晉陞慶成王府教授首以朱子白鹿洞學規開示學者諸生成知嚮學

呼爲沱陽夫子慶成王表其第曰學倡百代

韓學孔號玉齋義士信甫八世孫以歲貢授太平縣
訓導陞平順縣教諭晉陞慶成王府教授職業修
舉聲譽卓然微時傭書二年僅餘銀二十五兩偶
見一窮人鬻妻慨然贈之夫婦得完感謝而去至
明年送還猶念其貧堅不肯受尤篤於行誼凡事
務實踐不爲空言學者多宗之

梁 綵字素菴趙村都人萬曆癸卯舉人授北直唐
縣知縣蒞任之初適值兵燹衣甲灰書徵提如雨
捐俸給之民賴不擾創明唐渠一道溉田千頃遺
愛在民久而勿諠

樊可允字中孚忠臣啟東子陝西華陰主簿會倖闖
過舉邑官吏咸劄劄趨拜允獨長揖倖闖怒曰主
簿敢抗於太監千歲耶允曰主簿雖卑爲民仰望
不可屈節倖闖愈怒詔錦衣衛杖二百奪職允含
笑而出觀者壯其風力

鞏良定北王都人萬曆丙午舉人授河南鹿邑知縣
補陝西朝邑知縣有假子妻母定曰律無妻母之

文獻通考 卷八
三
罰照漢王尊治武功妻母罰可也遂收捕射殺之
卓異內陞大理評事受詔鞠治魏忠賢論曰此出
朕命毋畏忠賢定對曰法之所在陛下不能使輕
重何畏忠賢

國朝

薄鳳儀字瑞虞芳蘭人康熙戊子舉人授長治縣教
諭甫下車亟宣諭曰遭喪不許停柩姻嫁不許索
財諸生皆遵守康熙間定襄幾四十年不開科自
鳳儀起而以韓蘇歸胡爲文學者始識舉業正軌

張天彝教授洪次子雍正丙午亞元厯官湖北武昌
府知府以詩書飭吏事甚得人心少愛道學從遊
樊孝弟於書無所不通其教人忠信篤敬不以科
舉文授人曰此道心人心所由分也後爲當事者
所忌嫉人齟齬致仕歸當事逼死遂自縊輿論咸
惜之

薄美錦字七襄芳蘭人由拔貢授陝西花麻池鹽大
使除布政司庫大使性濶大敢任秦撫崔紀陳宏
謨前後皆欲以卓異薦惟秦藩帥念祖不畫公未

幾念祖以庫事被參美錦克全其事念祖悔曰寇
準遜於王旦遠矣遂贊其畫像云蓋嘗讀陳子昂
之敘見齊少府之行其真青雲之望重而黃綬之
位輕者歎著有錢法策行世

齊建中字懋軒龍門村人乾隆丙辰解元乙丑進士
歷官禮部祠祭司工部虞衡司屯田司主事兼通
倉監督居官清正不媚上大計註下考孫文定公
顧謂左右曰此官清苦第一可大用未至建樹乃
卒時年四十一詳見藝文

劉嗣漢字牧溪衛村人乾隆辛未進士授雲南嶧峨
知縣庚辰行取同考試官改汾州府教授幼敦孝
行靜重寡言尤嗜學嘗言古人讀書百遍魯鈍無
才何妨千徧知縣鍾一誠新建晉昌書院延爲山
長前後遠近出其門者二百餘人文無專集每出
一篇人爭誦之生平無疾言遽色年逾古稀尙無
跛倚之容壽至九十一

曹志彬字靖南王村都人以老諸生讀書談道來學
者常數十人疾革家人有祀事志彬曰吾一日未

死敢不有事於祖考起奠獻如儀既徹而卒門人私諡爲文成知縣費紹忠贊其畫像有曰千載有

公上追韓柳

樊先瀛字踞鰲孝子瀛元孫乾隆庚子舉人署四川青神南充名山平武射洪知縣時已老日以時事爲憂雖食息頃不能忘每聞一事可便民一人可建樹大則申請當路小則爲同寅者言殷勤鄭重不能自己竟用是得疾終年六十九自幼至老未嘗一日釋卷不觀鄉賢輦懿修比之趙閒閒云

牛星煥字拱齋待陽人乾隆壬子舉人授榮河縣訓導每明倫進講多所規正退則扃戶讀書禮樂御數無不博涉會榮河飢賑濟有法撫憲爲之擊節嘉歎

牛書田字芸圃以鄉薦舉孝廉方正官馬邑訓導遷代州訓導忤道憲棄官嘉慶己巳成進士署四川中江屏山溫江三縣知縣所至有惠政粵東閩中豫章西秦四省客商競頌爲卓茂循良朱登神父癸酉行取回考試官試畢回溫江得疾解綬旋里

卒於西安旅邸川督聞之遣人詣陝祭之

樊士瀛號煜亭孝子瀨元孫嘉慶庚申舉人授廣靈縣訓導偶見城牆隈白骨填積詢之乃遠年戰死者士瀛感然曰戰死已苦矣遺骸暴露何忍見也遂糾諸生作義塚埋之嘗願山中靜坐十年讀盡天下有字之書識透人間無字之理督學賀長齡以王問目之卒於官靈士縞素送歸

郭安鉦字瓊圃義士正修子嘉慶辛未五臺 召試

一等第一名充國史館謄錄已卯舉人道光癸未

進士除河南武安縣知縣剛正嚴明政績尤著豫撫有處置得宜之褒

吳鶴書字椿年蓮江子嘉慶己卯舉人署河南陽武知縣除盧氏知縣調確山知縣居官清廉所至建白皆關國計民生在確山時有疑獄瞑目尋思久之倦睡夢一馬飛天上命緝馬上天果獲民感其神爲建生祠

吳德光字實甫南關人咸豐壬子歲貢母歿哀毀盡禮事父姊以孝友聞雅爲紳丈郭樸延太史所重

及太史考散羅次知縣鳴珂列騶到門偕往光輒
稱疾不前太史愈重之爲人幼喜讀書晚年所學
益醇每暇日引文士相與切磋接之以禮未嘗見
驕色知縣聶文炳贊其畫像有云美義至行人所
鮮能性樸質茂不仕自崇其真不爲燥濕輕重不
爲窮達易節之人

齊濟河字瑞清龍門人道光庚子副貢家貧投徒性
孝友人不間言與人語率本經術和藹之氣使人
意消及卒鄉人立石頌之

陳元普字德施城中人咸豐丙辰恩貢懷才抱德不
樂仕進設教於谷邑從遊者嘗百餘人所交皆名
士與人議論率多取人之長雖見其短未嘗面折
惟微示意以警之人多退省愧服及卒喪不能葬
其門人滇撫杜瑞聯捐金助之

子以四教先之以文論四科者首之以德文以明道
道以進德卽學者致知力行之功而德則文之本也
聖人教人固欲其文德並進而學者之資性不能無
偏故四科中已有德行文學之分矣後之學者能學

行兼優華實並茂斯彬彬乎禮樂之選也孔子云行有餘力則以學文說苑云德者養善而進闕者也故文德之士允宜直接義行以徵不朽矣

武功

北魏

爾朱榮九仙原人幼好射獵每設圖誓眾便爲軍陣之法號令嚴肅眾莫敢犯秀容界有池三所在高山之上相傳曰祁連池魏言天池也父新興曾與榮遊池上忽聞簫鼓之音新興謂榮曰古老相傳

凡聞此聲皆至公輔吾已衰老當爲汝耳汝其勉之正光中四方兵起榮遂散畜牧招合義勇秀容并州胡民叛逆并討平之除鎮北將軍進爲大都督肅宗崩榮奉莊帝爲主詔以榮爲大將軍大丞相封太原王時葛榮凶勢轉盛將向京師眾號百萬榮率精騎七千大破之擒葛榮餘眾悉散先後詔增邑二十萬戶爲太原王國邑

唐

李宏號王鳳子封定襄郡王

郭英太原郡公知運子廣德元年以軍功封定襄

郡王

五代唐

董重進董村人董狐裔孫少孤貧乏食流寓朔州晉
 王克用破朔州得之賜姓李名存進從破黃巢為
 義兒軍事莊宗從戰河上舟兵來往頗以為勞存
 進乃以葦竿維大艦為浮橋莊宗大喜解衣賜之
 以功遷振武節度使晉討張文禮於鎮州以存進
 為招討軍於東垣渡東垣王惡築壘不能就存進
 伐木為柵文禮子處球以兵千餘逼柵存進出戰
 橋上殺其兵殆盡而存進亦歿於陣追贈太尉

金

趙儒字才叔待陽村人以經義進士累官信武將
 軍加騎都尉平居若無能為及臨陣論軍機事毅
 然以三邊之重自任節制兵馬踰二十年綬帶輕
 裘以方羊祐云

趙億儒仲弟為西秦副將邊部攻之流矢如雨集
 億帳下讀書言笑自若

元

張安甯南邢人系出曹州張文定公以孝友樸直稱于鄉里官至忻州州將時歲大荒州境幾爲魚鼈安甯議蠲議賑苦心調劑民免於災元好問爲撰墓表詳見藝文

蘭 用西河頭村人至元閒以武功授北五州提領高 擢鳳凰山下人至元十八年授武畧將軍充征行軍務披堅執銳戰必有勝

明

趙 成趙家營人以開國功授征行百戶洪武初從常忠武掃北陣傷殘疾予襲千戶職

主 忠字世忠太原郡侯勝長子襲侯爵守蔚州靖難師起都督征討右軍事晉榮祿大夫封一等靖安侯爲人有膂力善騎射臨戰身先士卒及戰勝必以功推下軍士皆悅

蘭敬祖提領用之裔孫永樂初以材力拜宣威將軍晉錦衣衛鎮撫

石 忠字宗貴武節將軍起夫長子以武生襲海門

衛指揮僉事陞羽林衛都指揮僉事靖難師起隨
成祖進征有功授大同副總戎尋調海門海門兜
啼輒怖之日石總戎來

國朝

王國瑜字君璋乾隆丙午武舉授貴州平遠協右營
守備以戰功陞雲南臨元鎮都司征鎮甯州入陸
橋貓叛歿于王事廕子萬興入監

梁清城東鄺村人道光壬午武舉授平陽府右營千
總署本府右營守備調署澤州營礮廠守備辛丑
英夷之役克山西太原南鎮帶領官兵兼管湖北
衛昌營藍翎馬隊屢立戰功威聲大震

太史公曰富貴而名磨滅者不可勝數惟倜儻非常
之人稱焉生斯世也不能建功立勲使夫績紀旂常
名垂鍾鼎則亦與草木同腐已耳烏足貴哉襄地處
北方風氣剛勁多雄武非常之士習于戰鬪斬將奪
旗往往奮不顧身以殉國家之急其間雖有大小不
同而亦莫非武功也倬彼芳猷景行不遠有志者可
使旂常鍾鼎之業竟爲絕響乎哉

定興縣志 卷八
隱德

明

寇祖恂舉人禧之五世孫永樂甲午舉人隱居不仕
編籬爲圃布衣蔬食泊如也與郭瑄講性命之學
學者宗之

樊尹東忠臣啟東三弟嘉靖辛酉歲大飢輸粟賑濟
活飢民四萬有奇例給輸粟助公生員萬歷間以
義累補三爵辭不就

國朝

鞏 鄒典禮良賓孫施棺瘞骸捐穀賑飢閭里德之
與樊孝弟相友善雖在閭里慨然有董正一方之
志嘗問樊孝弟六經奧義歎曰與樊孝弟言如坐
春風

傅調羹字鹽梅文恪公會孫邑諸生平生介節不苟
家居守約鑽研六藝紬繹百家善屬文直入金陳
堂奧年踰六十舉价賓嘗遇一田父械鎖悲泣問
故云歉糧錢十五千不能償官司督責生不如死
調羹如數與之遂得釋

定襄縣志 卷八
樊斗照字映紫孝弟先生子邑諸生博學能文文學
韓柳沈宗師以姚文毅目之會太原縣飢有餓民
數十家運小車到其弟碾店糶米適朔平輓老米
四萬斛積店中照語弟使全借糶弟不敢任照曰
人飢如此仰哺久矣必待米主至人盡斃也我願
以全產易一邑人命遂將其米糶之且不問糶者
姓字糶者亦不償家乃破人以爲愚劉嗣漢作義
士傳蓋嘗比之范堯夫云

樊必達字晉階孝弟先生從孫太學生六歲失恃擗
踊哭泣幾滅性兩事繼母皆贊其孝及父以慧病
癱瘓服事七年晝夜不離側疴癢必親爲搔遇歲
凶盡發儲得五百斛邑人因賴以活孫錫桂辛酉
舉人元孫麟定乙卯武舉現任平陽營守備人謂
積善之報進士劉嗣漢爲撰實錄

韓聲振南關廂人增貢生力行善事唱修廟宇設燈
火以照人行夜有遠歸者則給之如是者二十餘
年鄉人德之

趙文燦趙家營人以勤致富嘗修百泉嶠石路及石

嶺關石路又忻州南關茶房施錢二百餘千青石
村茶房施地十畝其他義舉不能備載

吳燦字光烈趙村都人爲太學生家貧讀古人書
力耕以養其親已而浚北關渠十餘里通滹沱河
入古城北溉田數十頃比三年榛莽皆爲膏腴子
二蓮江庚申歲貢蘭江壬子舉人孫翰書登進士
鶴書登鄉薦皆官知縣

侯顥字明遠南關廂人少奉雙親克盡子道後失
怙獨侍慈母有異父兄無養力爲治產以慰母心
爲族中婚葬者數十家嘉慶五年知縣王之屏親
訪懿行力舉耆賓

梁蔚巖字九峯義士而實曾孫耆賓處家以孝友聞
嘗開設紙房渡世一切周急濟貧取資焉其伯兄
家計中落遂讓與姪孫開設人有操白金託居間
者謝曰人心如青天白日乃以烏獸視我耶因而
不悅者累日及卒揀選知縣吳蘭江爲表墓

樊叔昌監生必達子庠生酷好朱子近思錄及小學
諸書遇事接物率以坦懷自矢父患痿痺湯藥必

親嘗憂懼至廢寢食侍養七年父痊愈母曹氏亦
衰老朝必親爲理髮夕必待爲解衣母好聞忠孝
事又輒述經史以寬慰之母享遐齡人咸以爲孝
思之所感云

牛四達舉人上達弟嘗在城設飯館一日有某夫婦
入館食畢相向哭泣異而訪之知親老乏養賣妻
以養親故悲耳四達慨然取金十兩助之勸其引
歸另圖生活夫婦叩謝而去後數年猶子書田訓
蒙五臺縣署出外遇尋牛先生書田問故始知從
父有恩於某因述顛末於東公王含溪爲作傳

樊明倫字敘五南關廂人家貧業賈長子煥發拾遺
金於路明倫知之曰得橫財必受災殃切勿匿也
俄見一客倉皇來覓明倫詢知還之願以半謝明
倫力却不受客拜而去及至親密友所關巨務凡
緩急雖數十金至數百金片語立應竝無責報之
念次子裕發以舉人宰壽甯人皆以爲積善之報
御史任伯寅作傳蓋嘗比之宋澄賈文富云

喬名升附貢南關廂人識度清遠弱冠有盛名嘗作

戒淫說劉牧溪擊節賞之後父得癱疾不能動
履居常鬱鬱升思所以娛之遇演劇負父及所侍
坐側每一齣終必陳說所以以資色笑皆至性所
流露若罄篋賠糧義舉尤足多也

侯象賢顯之子事親克順志父病衣不解帶者八十
餘日及歿極哀毀親族議表之力辭曰我不敢悖
逆者特不欲忘本耳烏足以言孝後與鄉飲梁孝
子濟輿爲作隱德傳行世

傅承澤文恪公元孫太學生晉贈山西全省提塘嘗
客臺山夜聞山下悲啼聲急下山問之則里役失
遺多金無以償官欲觸石死承澤隨取金如數畀
之里役叩謝而去至其設立家塾利人濟物難更
僕數

王夢蘭辛庄都人早歲失怙事母孝母晚年失明百
藥罔效蘭親口跪舐母目如是者有日後堂姪吉
人南遊江蘇其家公糧私債蘭爲代完比吉人反
不問蘭亦不言鄉人咸稱盛德云

齊 泰龍門人家貧好善凡見途中瓦礫有碍行道

必掃除之及如秦遇一窶人訝其貌有書卷氣叩其業敏而能文輒取金十兩助之窶人感泣而去越明年有人泮連登者旅邸訪拜視之卽前助金窶人於是爲善益力

梁炳文義士濟源子以附貢鄉飲大賓性和柔不與人校曲直嘗與鄉某爲地鄰某屢侵占數畝殊不怨反以善遇時論服其長者

吳 璫字產璧者賓維孝子居心仁厚和睦鄉鄰長壻郭樸延太史出仕乏費變產助之族黨貧人乏衣食者求之必應遇人網禽鳥必放之值誕辰親朋慶祝見其舉止若仙請曰翁今五福兼備必有陰德璫曰無他但生平惟奉行戒溺女文耳衆賓欽服

傅榮沂字撰亭文恪公六世孫邑庠生晉贈武翼都尉教授生徒敦善不怠嘗與同庠結社惜字放生戒淫殺口過行之有年子四世俊登武鄉科歷官九江衛守備世清邑庠生世福太學生世英登武鄉科官京省提塘 欽點營守備孫續祖登武進

士官邵武府參將世之君子觀此可以興矣

鞏安國東作村人嘉慶戊午武舉試用轅門千總少
倜儻有大志能左右馳射驍勇絕人不讀兵書而
能暗合十五年有甘州張姓者僑居南庄毛氏館
名假舍藥實屬教匪良民惑其教者甚多知縣林
濬源獲張收禁按簿查名約計兩萬餘人謀申撫
憲張自度難适服毒死其被誣者安國悉爲雪之
後萬眾捧萬金相謝辭不受曰豈有解人厄而利
謀等盜矣其捐賑減價糶粟之類尤推盛德云

鞏殿邦字磐石東作村人嘉慶甲子武舉選千總
有膂力能詩抑豪強剋蠹弊盜畏其名聞風而遁
從此東作久無犬吠之防

韓映光教授學孔七代孫太學生閉門肆志於學足
不蹈公府事父母謹嚴非有大故未嘗去側每日
衣冠問候備物盡志惟恐有失若助葬完婚創修
廟宇又行不輟云

韓謙光仙居令觀光弟太學生與兄並守家訓同讀
書敦尚實行性好施每遇婚喪不能舉輒捐金助

之子掄魁登武鄉科授東昌衛平山後幫協運府
千總

周岷陽監生愈之子嘉慶辛酉武舉授兵部差官揀
選營千總爲人豪俠好義凡周急濟貧之事終身
遇之必爲壬戌赴京至畿輔聞有哭聲甚哀者問
之乃一人出外十八年不歸其母年老窘極嫁媳
以圖兩活得豫省布商四十金晚即隨去姑媳傷
離別耳岷陽亟措金十兩固封爲作子書言近獲
利千餘金三月後即歸先寄金十兩等語親送去
姑媳得書以示布商商即取原價去越三月果如
其言壽甯宰樊裕發爲作傳

智樂水王村都人太學生賦性慈良處兄弟篤愛祖
遺產業悉讓弱弟嘗免佃戶田租義聲尤著食其
德者至今思之

石秀元字仲善公舉耆賓孝子舍鑽元孫少失恃事
繼母至孝母嘗有頭疾秀元禱以身代俄而母苦
遂愈時赴臺邑載石炭路出小王村遇大風聞崖
下有呼救聲急趨前見一婦被燄雄逼姦秀元不

定事不元 卷八
顧害奮力救護以全婦節道光十二年知縣廖朝
給匾曰內行純篤

喬可休名升子附貢崇尚儉素一日場樓課業時值
秋成見有本廂李姓嫠婦在其地竊禾其子欲下
樓奪之休曰家貧乏食自出無奈彼少年女子一
時增羞或生他變悔何及矣子遂悟至若敬宗睦
族賑飢濟貧皆其至性所流云

喬晉英南關廂人例貢生急公好義排難解紛人以
是咸稱長者道光十二年邑大凶貧人問計於英
英倡捐富戶米煮粥賑飢全活無數其他懿行詳
墓表見柳亭文集

丁養元揚芳村人太學生性篤孝事父母無違父母
歿每食肉必大啼人問故答曰欲以肉奉親先嘗
不可復得也待弟姪逾於所生以故終其身無願
分炊者

梁毓秀東鄰村人性孝友耕讀爲業從弟奇秀嘗出
外貿遷渺無踪跡毓秀托訪不得切耗親歷險遠
半載見弟勤歸至縣界窺弟有籃縷無顏歸鄉狀

急爲更衣備馬歸割產給之事聞知縣林澹源給匾曰孝友家風

梁毓靈號養齋義士濟源姪孫武庠生剛直好義四歲失怙祖溥源多疾有負債積券千餘金欲焚未逮而卒家人覓券不得諫已焚迫毓靈十七忽得之甕隙祖母命討之毓靈諫曰不可焚券之名久已外著如討不任彰人昧心即討而任掩祖美德不如成祖志遂焚之聞者感激

傅憲孔邑諸生西營村人爲人厚重簡樸外不足而內有餘與人言呐呐然不能出諸口事多與古人相合人輒信而任之道光十二年歲大飢乃盡發所儲雇傭刈草餓人爭受役皆賴全活而生畜亦俱得養邑人稱古君子云

梁昇瀛字孟洲南莊人附貢生事親以孝聞親有病痛不可忍晝夜嘔呻昇瀛除穢進藥至忘寢食及歿苦塊泣血居喪三年至若庇蔭宗族輕財好義尤人所矜式云

德而曰隱辭其名也非但不居其名抑並不自知其

德也故易有之曰龍德而隱者也不易乎世不成乎
名遯世无悶不見是而无悶樂則行之憂則違之確
乎非富貴貧賤所能奪也嗚呼人生不百年富貴貧
賤乃朝權之榮枯耳積善祇恐時日無多何患名之
不顯世之人不惟德當隱而報亦何可望哉

文苑

金

趙 憲字仲常詩人元之從弟金末避難洛西山中
雅好著述雖力耕畎畝恒以筆硯自隨置一笥遇
有所得卽書以投其中久之成帙詩有黃塵滾滾
時隨脚華髮蕭蕭老壓頭之句見中州集

明

邢克中郎中洪之孫才思俊敏詩文並工從游者七
十餘人及卒門人錄所著字學反切分明迄今佔

畢之家猶傳習之

周 宣字體中元帥獻臣之後博極羣書貫澈萬類
工詩有重名

國朝

牛翰垣孝子君相從孫康熙四十七年歲貢忠厚謙
和文頗新穎雍正五年重修縣志與有力焉

馬 驥牛臺都人僑居五臺河邊村雍正癸卯舉人
欽賜內閣中書持論侃侃號史癡

薄 經字子常芳蘭鎮人雍正癸卯拔貢丙午第三
名舉人充陝右壬子同考官制藝尊爲大家生平
爲文不近諛爲詩不近俗

石如玠字少瑜孝子舍鏞孫受業樊孝弟講貫精詳
迂腐洗化爲文清雅絕倫年廿四登雍正丙午鄉
榜主考姚公三辰何公宗韓謂爲一時文人之冠
三試禮闈不第因苦心研索竟以嘔血卒樊孝弟
歎曰此子弗壽亦襄之文運一厄云

鄭師健鄉賢相長子乾隆丙子舉人性博雅罕與俗
交著有映奎堂文稿德水蘇鱗長古齋趙調三評

謂卓有名家風

韓齊黃太學生南關廂人峭直有行嘗面折人短退無怨言鄉曲推其公正爲文不尚妝飾以詞伯獨步一時銘功德者多趨其門

樊源達字澤長孝子灑之孫優行生員志尙冲雅不狃流俗從學叔祖孝弟先生得操心之要及設教河汾講道專以爲己爲學一夕盜入館知爲源達所居卽去之他古陶程前聞而歎曰忠信可行蠻貊于此可見晚居里第日與知縣鍾一誠力興古學根極理要鍾一誠因給豹變南山匾

牛上達字岸然孝子儲文猶子乾隆壬午舉人性剛正不借于俗能詩喜飲酒著有卧遊軒詩鈔陶西圃先生撰序弁首

樊佩玉字鸞臺源達子以廩生飲介賓長於議論文麗而思深家貧就館綿上平陶祁奚諸邑布衣疏食處之晏然危坐斗室日研周易爻象夜則與弟子評論通鑑得失商確朱陸異同每有心得輒呼指授遠近翕然宗之門人私諡文襄先生

賀錫冕字士章學正錫躬弟乾隆壬午舉人庚戌

欽賜國子監學正主講晉昌書院與樊源達交得
二曲孝弟之傳以應王舍溪之聘主講五臺崇實
書院評論古今商確得失徐潤第師事之

邢王棟郎中洪之裔孫乾隆己酉舉人授黎城縣教
諭爲人好學老且不倦詩文成一家言著有黎城
偶紀候三槐爲撰敘

樊裕發字颺風南關廂人乾隆甲寅舉人授福建壽
甯知縣有異政辛巳歲飢發粟煮粥全活甯民甚
多罷歸本性理之學善誘生徒尤好著述有敬式
堂全集梅村攜草諸書行世

張應蛟字毅齋西營村人少貧母周氏知書親授之
讀比就傅資性穎悟日記生文七篇聞異書必借
鈔博學多識爲一時文人所推重登乾隆乙卯鄉
榜所著文散佚無稿其詩集自序有云江州送客
青衫之淚偏多阮子窮途白眼之悲彌切一生慷
慨悲歌未獲其志年四十餘卒聞者惜之

智性成邑庠生南鄆村人少好學周覽百氏善爲文

定縣志 卷八
章嘗擬解因策誤見貼典試惋惜不已闡墨出首
刻其文批清警透快刻切老鍊者八極時號八極
解元

鄭恩紱鄉賢相曾孫嘉慶戊午舉人官襄陵縣教諭
博極古今以詩文名世

智漸達性成子公舉介賓嚴毅自持以文學著一時
名士如智一中魏輔仁張紹郿鼎列其門下學者
因所居稱南坡先生晚年匿跡韜輝更名藏用聲
愈著及卒鄉人巷哭

樊錫桂字仙枝必達孫嘉慶辛酉舉人文學敏健遇
事敢言以直躬行道爲己任著書多涉諷世故不
遇於時館東曹公谷邑巨室愛其品學願出萬金
爲謁銓桂以母在不敢遠離堅辭

韓 文字雲溪城中人嘉慶庚午舉人授文水縣教
諭未仕卒品行端嚴每名流燕集文至座皆斂容
鞏惺齋曰身長七尺容貌秀偉議論宏辨學富五
車使人那得不畏著有雲溪雜錄

郭安齡字夢九孝子會朝孫嘉慶戊辰舉人已已進

分彙不記 卷八
士 欽點翰林院庶吉士改雲南羅次知縣調會
澤知縣卓異陞鎮沅直隸州知州嘗曰爲政之要
有四謹民政肅官箴崇教本杜邪淫某嘗以是自
勗

李鏞經字子畚孝子彥俊曾孫嘉慶丁丑進士歷官
戶部郎中江西建昌府知府調吉安府知府器局
沉凝學問精密著有雜文偶存嘗主講晉陽書院
協修三立閣史鈔學者稱爲西河先生

智一中字子精孝子增全從子嘉慶丙子順天第三
名舉人作文有奇氣尤以詩名嘗曰詩當取林蘇
黃而音節以李杜爲宗每一篇出學者傳誦之

侯親賢字仲仁孝子運達子嘉慶庚辰進士歷官禮
部主事客司掌印聞親病即日解印綬歸遂不復
出主講太谷書院與士子講舉業法文風一變晚
年家居日以詩賦自豪號廉石居士壽七十五

張世祿字禮臣衛村人道光辛巳舉人博學能詩有
菊花二十首皆清妙奇絕錄其一云石榻雲開月
半輪柴門杯酒性情真千年陶令人誰識晚節貴

花是後身督學周石芳稱爲張菊花著有牧橋詩
集行世

郭庭治字樸屏受祿鎮人道光丙戌歲貢以七言詩
名世邑宰造之杜門不見嘗悉散家貲贍其族灌
園讀書澹泊自適知縣袁楷徵爲塾師謝曰門一
杜其可復開乎

郭守誠字則明張村人道光丙申 恩貢文粹行醜
冀北賢達多問其津如忻州孔舟山傳性五臺李
東治永清嘗持文集正於誠誠俱挽登道岸焉

梁契孔號泗心孝子濟輿次子道光癸卯舉人主講
鄉塾素有師嚴道尊之譽年七十授渾源州學正
及試大府同署撫王蔭公訝其精力健文思捷書
法迅速韶秀諱於衆曰此夔鑠公可稱三絕奇人
也

梁述孔字彭孫孝子濟輿三子道光丙申進士即用
貴州知縣性濶達以養母終身不仕業師徐繼畬
手書作吏愈知書味永親民方驗性功深促之不
就仍與兄怡怡一堂知縣王恂嘉之題其亭曰棣

葛厯主平遙祁忻書院教授生徒多掇巍科所至
文風一變一時號爲文宗詳見著述

侯晉元南關都人咸豐甲寅 恩貢雅善文從樊錫
桂遊傾動谷邑諸巨室人不敢以從史目之少甚
貧知縣袁楷以兩斛米周之辭不受其清介如此

周 璜字渭溪南王村人咸豐戊午 恩貢主講晉
昌書院得人爲盛樂聞善以推引後進爲己任與
梁契孔齊名人稱梁周

同一文人取行曰德取藝曰苑可知字義之不容不
講也字義一事差之毫釐失以千里如少陵羣山萬
壑赴荆門使改羣字爲千便不入調其他可以類推
流寓

周

豫 讓晉畢陽之孫始事范中行氏而不說去而就

智伯智伯寵之及三晉分智氏趙襄子最怨智伯
漆其頭以爲飲器讓讓遁逃山中曰嗟乎士爲知
己者死女爲說己者容吾其報智氏之讐矣乃變
姓名爲刑人入宮塗廁欲以刺襄子襄子如廁心

動執問塗者則豫讓也刃其扞曰欲爲智伯報讐
左右欲殺之襄子曰彼義士也吾謹避之耳且智
伯已死無後而其臣至爲報讐此天下之賢人也
卒釋之豫讓又漆身爲厲滅鬚去眉自刑以變其
容爲乞人而往乞其妻不識曰狀貌不似吾夫其
音何類吾夫之甚也又吞炭爲啞變其音其友謂
之曰子之道甚難而無功謂子有志則然矣謂子
智則否以子之才而善事襄子襄子必近幸子子
之得近而行所欲此甚易而功必成豫讓乃笑而
應之曰是爲先知報後知爲故君賊新君大亂君
臣之義者無若此矣吾所謂爲此者以明君臣之
義非從易也且夫委質事人而求弑之是懷二心
以事君也吾所爲難亦將以愧天下後世人臣懷
二心者居頃之襄子當出豫讓伏以過橋下襄子
至橋而馬驚襄子曰此必豫讓也使人問之果豫
讓於是趙襄子面數豫讓曰子不嘗事范中行氏
乎智伯滅范中行氏而子不爲報讐反委質事智
伯智伯已死子獨何爲報讐之深也豫讓曰臣事

范中行氏范中行氏以眾人遇臣臣故眾人報之
智伯以國士遇臣臣故國士報之襄子乃喟然歎
泣曰嗟乎豫子之爲智伯名旣成矣寡人舍子亦
已足矣子自爲計算人不舍子使兵環之豫讓曰
臣聞明主不掩人之義忠臣不愛死以成名君前
以寬舍臣天下莫不稱君之賢今日之事臣固伏
誅然願請君之衣而擊之雖死不恨非所望也敢
布腹心於是襄子義之乃使使者持衣與豫讓豫
讓拔劍三躍呼天擊之曰而可以報智伯矣遂伏

劍而死死之日趙國之士聞之皆爲涕泣

戰國策
○注云

衣盡出血襄子回
車車輪未周而亡

王伯厚玉海或問豫讓事范中行氏又事智伯焉
得賢曰傳謂事范中行氏無所知名去而事智伯
禮曰道合則服從不可則去賈生謂反君事讐非
也考之戰國策豫讓畢陽之孫畢陽亦義士送伯
宗之子於楚事見晉語讓無忝厥祖矣胡明仲謂
讓無所爲而爲善真義士也千載之下有知心者
自古皆有死讓至今有耿光彼背義忘君若唐六

定襄志 卷八
臣之流亦少媿哉國語晉伯宗妻謂伯宗曰諸大夫莫子若也然而難必及子子
蓋亟索土庇州犁焉得畢陽及諸大夫害伯宗畢陽實送州犁於荆

晉

王 濟字武子晉陽人父渾以平吳功拜司徒濟少

有雋才善清言爲名流所重官太僕嘗讀書午子谷中後人因呼爲武子山

北魏

司馬楚之晉宗室避劉裕之難入魏寓居定襄新莊頭村聞晉亡哭泣不食魏高其節拜散騎常侍從魏太武征柔然別將督軍糧俄而軍中有告失驢耳者楚之曰此必賊遣人入營覘伺割以爲信耳賊至不久宜急爲備乃伐柳爲城以水灌之城立而柔然至冰堅滑不可攻乃散走太武嘉之拜雲中鎮大將朔州刺史在鎮二十餘年以清簡聞子金龍寶龍相繼鎮雲朔士民服其威德

唐

宋友文汾陽人僦居定襄之神山麓定襄士人共爲築室壘石栽花辟徑琴書造訪者無虛日神山古

名宋村因此

金

田紫芝字德秀滄州人父濟以蔭爲部掾紫芝少孤養於外家定襄趙氏因僦居於待陽里年十三外祖廣甯治中命賦麗華引語意驚絕人謂李長吉復生資性穎悟一覽萬言年二十讀經傳子史幾徧爲人疏俊而以蘊藉見稱與忻州王元卿齊名貞祐初避兵臺山倉卒爲游騎所馳遇害時年二十四士論惜之

元

郝天挺交城人官至中書平章著唐詩鼓吹孫忠恕翰林待制獻所著無逸圖帝悅命總裁宋遼金三史書成歸隱定襄鎮安寨杜門陋巷而孝友耿介之風隱然推重天下

明

暴 昭浮山人僑居定襄寓一小樓以詩文名世後累刑部尙書靖難師起入金川門被執不屈死自古高人逸士負絕俗之姿遭時不偶往往寄寓於

名山奇水以發曠懷而抒奇抱又或逃名耽寂與世無求則亦遠適異域卜築巖棲以遂其高尚此流寓所以多名賢也定襄古晉昌地葢爾山僻孤處一隅多有名山奇勝可以供高士之登臨待幽人之托處也亘古亘今雖流寓於此者不一而名賢之遺風餘澤至今猶有存焉豈可忽乎哉

仙釋

宋

惠 勤餘杭人雅善詩爲歐陽修所重著有惠勤說後僑居定襄神山功德寺修鍊數年而去

明

冷 謙字啟敬秀水人洪武初爲協律郎郊廟樂章皆其所撰有友酷貧謙於壁間畫一門令其入恣取金錢以出而不覺遺其引他日內庫失金守吏持姓名迹捕之因并執謙謙渴求飲拘者以瓶汲水與之謙躍入瓶中拘者惶急謙曰無害第持瓶至御前上呼謙瓶中輒應擊碎之片片皆應後謙騎帚至定襄往來城市俗呼羊皮氏

張道人字太春自言省城太原人百有餘歲然亦莫知其處莫考其年身矮而肥其軟如綿膚色俱淡紅髮白重黑鬚亦然背能負重其行如飛往來於襄數十次居無定所通經書兼修養術冬月極寒伏冷窟中數日不出或十數日不出亦不飲食面不改色與衆坐有佞人輒不語邑孝子石含鑛牛君相得弱病從學其方得以延壽別後有傳坐化於都門者未知是否

花娘娘潘氏河南人明季河南亂娘娘與夫陳澄溪避難於沱北大南莊澄溪熟皮爲業娘娘織綿布鬻以養女及施行路者姜逆亂土匪劉遷乘勢犯境一村洶洶娘娘戒勿憂爲尺布寸縷千條用舊衣線貫穿令標之村外遷見之舍去醜類問故遷曰鄙村無富戶也人神之故婦女從學績織娘娘口講指授盡傳其術自是婦女同心協力一月竟得四十五日數年之間布積人足服用綺繡無益之飾不禁自息是大有功於名教也歿後鄉人感

其德構堂莫焉號曰花娘娘

牛仙姑趙村都郭之美妻幼事舅姑至孝家甚窶潛
心空寂冬日遇薪柴輒拾聚路旁爲行人禦寒資
又募金建堂一座以供觀音工竣仙姑亦垂鼻注
而化人咸謂觀音後身云

田大姑乾隆間劉彥德妻年幼喪夫安貧守節位置
不與尼巫梯接年四十斷葷酒爲道姑募化十方
建菴一座獨處如老頭陀臨終延名尼遷床念佛
或問曰大姑卽今身在何處曰我在白蓮花座又
曰無數諸佛金光耀目今日午行矣時至怡然坐
化村人奉而藏之於菴嘉慶二十二年旌表

考春秋魯以外紀所聞而班史自漢以上旁及古今
年表爰是有不產於襄而偶寄於襄者羽流老衲採
藥鍊真托足幽巖邃谷之外若鴻雪萍踪之神奇皆
閒一及之爲博古者助

異人

明

梁五癸東鄆村人家貧飲食不給不肯干人有勸其

貸者曰貸則必償不能自給安能償人若乞鄰以生不若死一毫不苟取竟餓死

國朝

吳立祥北關廂人性孝友喜道因果幼失恃事繼母甚孝鄉黨無閒言年踰五旬得禁口疾藥餌罔效南遊訪名醫至江南界旅邸遇一道人自稱姓周專治禁口立祥請療之道人持牙戟由喉中割出一肉蛾疾遂愈立祥欲厚酬之道人已失所在後享大耋乃卒卒後復有見之河上者

樊光瀛字裕卿佩玉五子博學強記問無不知少日治易有聲場屋年十五補博士弟子員不就舉遂雲遊四方改名今是字昨非自號雲鶴居士戴烏角巾項後垂雙帶赤紅狀如牛耳手搖羽扇時人目爲樊神仙落魄嗜酒每入城市人爭以酒食遺之食畢人與之紙落紙數千言詩筆字畫皆超絕或問以故事其應如響談論之際極有情趣則又以世外恍惚事亂之後竟不知去向或以爲成仙

云

薄芝蘭芳蘭人少讀書日記數百言有神童之目長
命不猶以至落拓爲句而介性不移問以詞訟謝
不知曰吾不敢顛倒是非處以館辭不就曰吾不
敢誤人子弟里有再醮婦求寫婚書啖以利峻拒
弗顧曰吾不敢獲罪於死鬼常言君子防未然瓜
田李下未嘗過而走非其分所有雖拾遺於路必
歸失主冬夏惟一領布袍懸鶉百結歷數十寒暑
不易昂首徐步往來村郭間常有蕭然自得之意
臨終預尅死期如言而逝

異人一門何爲補也補乎其人與事之皆爲邑所異
也蓋異人而迥異時流亦人與事之可紀者故直接
仙釋以見一班若必矜奇立異附會不經則將雜齊
諧於雅正恐非所以信今而傳後矣

糾誤

周

狐 突定襄龍門村人晉大夫懷公時突子毛及偃
從重耳如秦公執突曰子來則免對曰子之能仕
父教之忠古之道也今臣子從公子亡若又召之

教之貳也卒就死葬於交城馬鞍山故史志皆誤
稱交城人舊志亦遺而未錄今急登諸糾誤以樹
忠烈之望云

漢

霍去病墓舊志載在西邢村西墓地無幾有斷碑碑
有漢大將軍霍去病冑等字又有將軍同知八番
順元軍民宣撫司事霍君子萬等字後人不覈徒
以去病爲良將而又爲霍氏祖遂置冑字不道而
子萬之墓故訛爲去病按漢書元狩六年秋九月
霍將軍去病薨帝悼之命送葬茂陵爲冢象祈連
山夫既葬茂陵何又墓在定襄固知舊志之誤也

金

趙 元字宜之號愚軒信武將軍儒之孫幼舉童子
第以年及調鞏西簿未幾失明自少博通書傳有
詩名一時名士虛左相待通志云趙鼎字宜之金
元明遺事名元又名鼎舊志誤列鼎元爲二人故
取中州集愚軒居士傳載入藝文以爲糾誤之一
證云

元

許楫字公度定襄南王里人從元好問學中詞賦
選又舉賢良方正孝廉左丞許衡深器之爲陝西
道勸農副使以京兆西荒田數千頃立屯田後提
刑嶺北湖南辨富民賂佃代死者改提刑江南活
俘民六百口還業擢徽州總管飢民柯三八等爲
寇行省驛召輯撫諭降之通志誤爲忻人猶曰忻
襄舊相屬也若舊志誤爲大楫殊非信史故竊取
吳氏之晉乘續貂以正之

聞古晉之乘列於素王之筆而又曰董狐古之良史
也書法不隱夫董狐直是忠逆之雌黃不謬耳孰暇
糾此人名地名之誤雖謂葺乘之役未及問諸晉史
已亥仍訛三豕疏畧之咎焉能免乎哉

著述

金

孫內翰集

孫狀元九鼎著元遺山敘云吾州文派先生指授之功爲多

詞林體驗

孫榜眼九疇著亂離之後喪失無存

愚軒詩集

詩人趙元著中州集選其詩四十首

元

牛臺類書

軍民鎮撫李子敬者自敘曰自大德元年秋退藏牛臺每釣歸不甚困倦時亦隱几著書今無存

明

慎齋傳薪

贊善郭瑄著嘉靖三十三年被俺答入寇燒毀無存

論語訓蒙

贊善郭瑄著廣宗崔莊敏公撰序亦無存

金元明遺事

少府樊睿著刑部尚書董芳撰序

字學反切

詩人邢克忠著自序

承恩集

長史薄世佑著右布政王道行撰序

鰲川集

同知張九戩著太僕卿王治撰序

成已撮要

同知姚熙著右布政王道行撰序

南城詩集

麟遊丞樊鑑著右布政王道行序云先生中年致仕後即放情肆志於山水間飲酒賦詩以自適蓋一時人望也生平著作甚富惜散軼不可多得今搜獲南城詩鈔若干哀為一集

誠勗淺言

傅文恪公著一淫蕩誠言二酗酒誠言三鬪狠誠言四罔利誠言五詞訟誠言六詭服誠言七黨比誠言八傲情誠言為八誠

孝勗弟勗忠勗信勗禮勗義勗廉勗恥勗為八勗共文十六篇

署南雍祭酒時作

古今類書

傅文恪公著凡千餘卷光祿卿張泮撰序

文恪全集

傅文恪公著

率真鳴

參政鄭友周著

居家節要

參政鄭友周著

國朝

誠軒語錄

樊孝弟先生衆門人所記

春秋註疏

訓導薄巖著 嵎峨宰劉嗣漢撰序

鹿苑文稿

虞衡司齊建中著 孫文定公撰序

易經正解

廣宗令牛玉怡著

牧溪文集

嵎峨宰劉嗣漢著

映紫齋文集

生員樊斗照著 知縣高安徐濟言撰序

卧遊軒詩鈔

舉人牛上達著

亦樂堂詩集

江浦令牛先達著

四書註解

舉人鞏獻德著

保泰論

平武令樊先瀛著 言得失陳法戒辭多痛切 發於至誠載藝文

海峯全集

平武令樊先瀛著

映奎堂文稿

舉人鄭師健著

梅村攜草

壽寧令樊裕發著 御史任伯寅撰序

家塾誨規

生員李猶龍著 山陽汪文端公撰序

連三事類

樂平學諭樊步瀛著今無存

圖南卜易

烏程令鞏懿修著自序

圖南全集

烏程令鞏懿修著

惺齋文集

烏程令鞏懿修著

攀桂集續編

烏程令鞏懿修著武林韓文綺撰序

晉昌事類

烏程令鞏懿修著門人徐繼畬撰序

雜文偶存

太守李鎔經著江西李祖陶撰序

雲溪雜錄

舉人韓文著

牧橋詩集

舉人張世祿著

晉乘續貂

歲貢吳德光著垣曲學訓高文愍先生撰序

拾遺集

歲貢吳德光輯自序

示及門卮言

進士梁述孔著載藝文

蓉洲文集

進士梁述孔著

綱鑑歷年紀事圖表

教授王亮功著

柳亭全集

貢生樊生春著

人以科名顯文不必以科名重也閭百詩甘老布衣著述千古儲同人未登甲第論定十家然而著述家數甚多業已各成其名後之人才力不逮者藏拙不

定襄縣補志卷之八終

爲則可若護其所短而反譏人之所長則不可彼以
角笑宮以青詆白者謂之陋儒范蔚宗云人識同體
之善而忘異量之美此大病也後之著述者切勿自
是以非古人也

